

石屏詩集



石屏詩集卷第一

近古體

求先人墨迹呈表兄黃孝文

我翁本詩仙游戲滄海上引手掣鯨鯢失脚墮塵
網身窮道則腴年高氣彌壯平生無長物飲盡千
斛釀傳家古錦囊自作金玉想篇章久零落人間
眇餘響搜求二十年痛淚濕黃壤君家圖書府墨
色照青嶂我翁有遺迹數紙古田樣髣髴鍾王體
吟句更豪放把玩竹林間寒風凜悽慘昂昂野鶴



姿愧無中散狀兒孤襁褓中家風隨掃蕩於茲見
筆法可想翁無恙幽居寂寞鄉風月共來往衆醜
成獨妍群瘖恠孤唱一生既蹉跎人琴遂俱喪託
君名不朽斯文豈天相舊作忽新傳識者動慨賞
嗟予忝厥嗣朝夕愧俯仰敢墜顯揚思幽光發草
莽假此見諸公丐銘松柏壙君其啓惠心慰彼九
泉望

夢中亦役役

半夜群動息五更百夢殘天鷄啼一聲萬枕不遑

安一日一百刻能得幾刻閒當其閒時作夢更多端窮者夢富貴達者夢神仙夢中亦役役人生良鮮歡

飲馬長城窟

朔風凜高秋黑霧翳白日漢兵來伐胡飲馬長城窟古來長城窟中有戰士骨骨久化爲泉馬來喫不得聞說華山陽水甘春草長

白苧歌

雪爲緯玉爲經一織三滌手織成一片冰清如夷

齊

一作齊美

可以爲衣陟彼西山于以采薇

黃玉林云趙懶菴爲戴石屏選詩百餘篇南塘稱其識精到其間白苧歌最古雅語簡意深今世難得所謂一不爲少

羅敷詞

妾本秦氏女今春嫁王郎夫家重蚕事出採陌上桑低枝採易殘高枝手難扳踏踏竹梯登樹杪心思蚕多苦葉少舉頭桑枝掛鬢唇轉身桑枝勾破裙辛苦事蚕桑實爲良家人使君奚所爲見妾駐

車輪使君口有言羅敷耳無聞
蚕饑蚕饑采葉急歸

題陳毅甫家壁

了翁之後也

朱門金叵羅九醞葡萄春酌貴
不酌賤酌富不酌貧君家破茅屋
飄搖河水濱中有一樽渌醉盡天
下人

荅婦詞

舊嘗和顧彥先婦荅夫二首故復賦此篇

江山阻且長矯首鄉關隔空閨泣
幼婦顛顛失顏色隱閔鶴鳴篇寄彼
西飛翼剝封覽情素既喜復

石屏卷第一
淒惻別時梅始花傷今食梅實覽古帝王州結交
游俠窟千金沽美酒一飲連十日春風吹酒醒始
知身是客杜宇啼一聲行人淚橫臆衣破誰與紉
髮垢孰與櫛勿謂遊子心而不念家室新交握臂
行肝膽猶楚越醜婦隔江山千里情弗絕慙慙揮
報章歸計何時決今夕知何夕覩此纖纖月此月
再圓時門前候歸一作轍

都中書懷呈滕仁伯祕監

北風朝暮寒園林日蕭條自非松柏姿何葉不飄

搥儒衣歷多難陋巷困簞瓢無地可躬耕無才仕
王朝一餓驅我來騎驢吟灞橋通名丞相府數月
不見招欲登五侯門非皓齒細腰索米長安街滿
口讀詩騷時人試靜聽霜枝轉寒蛸倘可悅人耳
安望如蕭韶

桐廬舟中

吳山青未了桐江綠相迎扁舟問何之往訪嚴子
陵高風凜千古卧蹴萬乘主富貴直浮雲羊裘釣
烟雨

湖北上吳勝之運使有感而言非詩也

蒼生積釁久天欲盡殺之干戈殺不盡繼以大旱
饑田野委餓莩道路紛流離衆人識天意不敢加
扶持公懷佛子性逆天救民命擅移太倉粟衆拂
生塵甑全活十萬家九州詠仁政逆天天弗怒鬼
神胡不恕白玉尚指瑕青蠅工點素秋風動蓴鱸
公亦思歸去問公歸去兮一作來蒼生誰怙恃一作恃怙

所館小樓見山可喜

茲樓非我有久居如主人雖無往來客青山當佳

賓君看樓下路三尺軟紅塵失脚踏此塵汨沒多
終身

客行河水東

客行河水東客行河水西客行河水南客行河水
北行行無已時朱顏變老色至人樓一方庭戶羅
八極保心如止水不受萬物役有道肥其軀故能
適所息

和山谷上東坡古風二首見一朝士今取一篇
自鬻鬻非奇貨強鳴非好聲法當老山林松根斷茨

蒼髯來長安道霜鬢迫衰齡窮吟無知音祇覺太
瘦生公詩妙一世風雅見根蒂比興千萬篇一作端已
作不朽計窮達雖不同嗜好迺相似一作斷

題古源棠和尚送青軒

南山色射窓北山光照戶道人處其中冰玉爲肺
腑茲山自開闢荒翳幾年所一朝得主人荆榛化
庭宇手披風月歲目極烟霞趣居然獲奇觀入境
賀相遇道人詩更高不作蔬筍語朝對北山吟暮
對南山賦聞說玉堂仙擊節賞佳句

大熱五首

天地一大窰陽炭烹六月萬物此陶鎔人何怨炎
熱君看百穀秋亦自暑中結田水沸如湯背汗濕
如潑農夫方夏耘安坐吾敢食

左手遮赤日右手招清風揮汗不能已扇笠競要
功南山龍吐雲騰騰滿虛空一雨變清涼萬物隨
疏通向人無德色大哉造化工

大渴遇甘井汲多井欲竭入喉化爲汗不救胸中
熱吾聞三危露迥與衆水別其色瑩琉璃其冷勝

冰雪安得一杯來爲我解此渴

吾家老茅屋破漏尚可住門前五巨樟枝葉龍蛇舞半空隔天日六月不知暑西照坐東偏南薰開北戶胡爲捨是居受此炮炙苦

天嗔吾面白晒作鉄色深天能黑我面豈能黑我心我心有冰雪不受暑氣侵推去北窓枕思鼓南風琴千古叫虞舜遺我以解好音

久寓泉南待一故人消息桂隱諸葛如晦謂客舍不可住借一園亭安下即事凡有十首

寄跡小園中自笑客異鄉東家送檳榔西家送檳榔咀嚼唇齒赤亦能醉我腸南人敬愛客以此當茶湯慙慙謝其來此意不可忘

寄跡小園中豈不勝旅舍俗事無交加客身自閑暇鄰家有酒沽杯盤亦可借吟侶適相過新詩堪膾炙足以慰我懷留連日至夜

寄跡小園中數椽亦瀟灑主人既相知此地可久假縣官送月糧鄰翁供菜把咫尺是屠門亦有賣鮮者里巷通往來欲結雞豚社

寄跡小園中餘春接初夏問木木成陰問花花已
謝黃鸝出幽谷杜鵑叫長夜把酒酌園婆遠客此
稅駕有時吟聲高鬼神莫驚怕

寄跡小園中一心安淡薄每坐竹間亭不知近城
郭昨日看花開今日見花落靜中觀物化妙處在
一覺委身以順命無憂亦無樂

寄跡小園中第一薪水便逐一炊黃梁兼得魚鰕
賤飽飯日無營遮眼有書卷時逢好客來應接不
知倦最苦風雨時有人招夜宴

逐一疑作逐日

寄跡小園中新晴風日麗好鳥竹間鳴野鶴空中
唳悠然動詩興行吟撫松桂久客若忘歸此身笑
匏繫五月倘未行尚及食丹荔

寄跡小園中頗欲閤形影誰爲饒舌者太守忽相
請開心論時務細語及詩境坐中有蠻客狂言事
馳騁明日酒醒來熟思令人瘦

閤一作閑

寄跡小園中忽有烏衣至手中執圓封州府特遣
饋羅列滿吾前禮數頗周緻四隣來聚觀若有流
涎意呼童急開樽四隣同一醉